

Увләр хөд хургьлуллгьнд оньган өгхмн

Яшкульск района, 108-ч номертә совхозин цуг нәәднр хөбдәс 5500 хөн увләр хургьлх зөвтә. Тегәд хөд хургьлх цаг өбрдәд ирхлә, хойр долан хонг өмнәснь хаша-хаацинь хәләджд, кемр хаша-хаацст болн дулан катгст ясвр кергтә болхла, цаг тудәл уга теругинь ясдж, эртәснь белн кех керг ик чинртә төр мөн.

Болв, увләр хөд хургьлуллгьна белдврин көдлмшиг ик хашнъгар кесн учрар ода чигн хаша-хаацснь болн дулан катгснь ясгджд белн болад уга. Улгүрлхд, ах хөбч ур Бульдигиров Ивана хөд бәәх хашан болн катгин уудснь ик заагта, теругәрнь салькн уләнә. Ах хөбч ур Дулахаевин хөд хургьлх катгин ора дее-рәснь усн ивтрдж дусна, хаша дотрнь хургьдта хөд бәрх клеткс болн оцаркс ода чигн кегдәд уга.

Ах хөбч ур Эрдниевин отарт 752 нәәднр хөбнә икнкнь чинән уга, эцн. Иим эцн хөбдәс сән төл авнавдн гидж сандж болшго. Чинәнә му хөбдиг оданас авн сән көк өвсәр, концентратар эс теткхлә, теднәс гарсн хургьл чинән уга, экснь эврәннь хургьдан тедждәджд чадлго гару гарад йовх зөвтә.

Нидн джил гарсн 1150 толгъа хургьдиг ах хөбч ур Козлов Василий асрджд йовна. Тер хургьдәснь 170 толгъа чинән уга. Кемрджән цааранднь хотхоолинь сәәнәр өгч эс ясхла гарута болхнь лавта. Ах хөбч ур Зайнудинов С. 1252 толгъа иргс асрджана. Тенүнәснь 165 толгъань эцәд босхан уурцхалжд. Тегәд эн иргсәс арвн хонгин эргцл 7-н толгъа гарута болв. Ах хөбч ур Абдулмуталиновин хәләдждәсн хөбдәснь 15-н хөн шүдн уга, дакад эн Абдулмуталинов хөбдән хойр хонгт нег дакдж услна. Хөбчнр бийстән 25 километр газрас ус зөбджд ууцхана.

Эн совхозин наадк нәәднр хөбднә март-апрель сармудт хургьлхмн. Тегәд хөд хургьлуллгьна белдврин көдлмшиг оданас авн кеджд дуусх кергтә. Болв совхозин болн фермсин гардачнр эн ик чинртә көдлмшиг учртан авлго бәәдг ик хаджгър гидж санх кергтә.

Совхозин партийн организац (сегләтрнь ур Молодец) хөбчнр, малчнр болн көдлмшчнр дунд цәәлгьврин политическ көдлмш делгү кеджәхмн уга. Хөбчнрт газет, журнал цаглань күргджд өгцхәхш. Декабрь сарас авн хөбчнрт джалвинь өгәд уга, хот-хоолар болн дулан хувц-хонрар бас күцднә теткгдждәхш.

Деер келгдсн дуту-дундиг уга кеджд, хөбнә төл авлгьнд оньган өгх зөвтә.

Т. КИЧИКОВ.